

PANTUN KLASIK

PERPISAHAN

MOHAMED NAIM DAUPI



www.saujana.sg

PANTUN PERPISAHAN (1)

*K*alau ada sumur di ladang,
Bolehlah saya menumpang mandi;
Kalau ada umur yang panjang,
Bolehlah kita berjumpa lagi.



PANTUN PERPISAHAN (2)

*H*ari ini menanam jagung,
Hari esok menanam serai;
Hari ini kita berkampung,
Hari esok kita bersurai.



PANTUN PERPISAHAN (3)

*O*rang Aceh sedang sembahyang,
Hari Jumaat tengah hari;
Pergilah kasih pergilah sayang,
Pandai-pandai menjaga diri.



PANTUN PERPISAHAN (4)

*B*intang barat terbit petang,
Bintang Timur terbit pagi;
Jika tidak melarat panjang,
Ada umur ketemu lagi.



PANTUN PERPISAHAN (5)

*D*ari mana hendak ke mana?
Tinggi rumput dari padi;
Hari mana bulan mana,
Dapat kita berjumpa lagi?



PANTUN PERPISAHAN (6)

*D*ian tiga lilin pun tiga,
Obor tergantung rumah laksamana;
Diam juga sabar pun juga,
Ada umur tidak ke mana.



PANTUN PERPISAHAN (7)

*T*uai padi antara masak,
*E*sok jangan layu-layuan;
*I*ntai kami antara nampak,
*E*sok jangan rindu-rinduan.



PANTUN PERPISAHAN (8)

*Batang selasih permainan budak,
Berdaun sehelai dimakan kuda;
Bercerai kasih bertalak tidak,
Seribu tahun kembali juga.*



PANTUN PERPISAHAN (9)

*A*sap api embun berderai,
Patah galah haluan perahu;
Niat hati tak mahu bercerai,
Kehendak Allah siapa tahu?



PANTUN PERPISAHAN (10)

*G*unung Pantai tinggai merawan,
Nampak dari padang temu;
Buah hati tinggallah puan,
Ada jodoh kita bertemu.



PANTUN PERPISAHAN (11)

*Sayang Sarawak sungainya sempit,
Buah nenas lambung-lambungan;
Hendak kubawa perahuku sempit,
Tinggallah emas tinggal junjungan.*



PANTUN PERPISAHAN (12)

*Hujan turun badan pun basah,
Batang galah haluan perahu;
Niat di hati tak mahu berpisah,
Kehendak Allah siapa yang tahu.*



PANTUN PERPISAHAN (13)

*H*arum sungguh bunga melati,
Kembang setangkai waktu pagi;
Hancur sungguh rasa di hati,
Sedang berkasih ditinggal pergi.



PANTUN PERPISAHAN (14)

*K*alau jadi pergi ke ladang,
Kain panjang cari dahulu;
Kalaupun jadi pergi berdagang,
Induklah semang cari dahulu



PANTUN PERPISAHAN (15)

*B*uah pauh delima batu,
Anak sembilang di tapak tangan;
Walau jauh di negeri satu,
Hilang di mata, di hati jangan.

